

CONVIVENZA

Istoric!?

PIEDER CAMINADA

Sche l'Italia daventia suenter il 1968 per la segunda giada campionesa europeica da ballape, saja quai istoric. E sche l'Engalterra cuntanschia quai per l'emprima giada, alura era. Uschia hai tunà in di avant il final dal campinadi europeic dals 11 da fanadur en ina prevista da Radio SRF. Pia uschè u uschia istoric.

Che la Svizra ha cuntanschì al medem campinadi europeic – per l'emprima giada ad in grond turnier dapi il 1954 – la qualificaziun per il quartfinal, è naturalmain era stà istoric per la «schurnaglia» da sport. Medemamain che la Macedonia dal Nord ha pudì participar per l'emprima giada insumma ad in campinadi europeic. In pajais cun quest num na devi anc betg fin ils 12 da favrer 2019, pertge che avant giugava l'equipa nazionala da ballape da l'anteriura Republica Macedonia mingamai sut il num provisoric e voluminus «Anteriura Republica Jugoslava Macedonia». Pia era quai tut istoric.

Ubain tuttina betg? È propi tut quai che capita per l'emprima giada u che n'è gia ditg betg pli succedì era gist istoric? È tge pled duess ins duvrar, sch'insatge è propi istoric e sto perquai vegnir numnà en tuttas enciclopedias da quest mund? Pli istoric che istoric na va betg.



Tge far? Forsa applitgar il linguatg in zichel pli moderadamain e betg adina gist duvrar in superlativ. Ubain far diever dad in vegl tric: in sabi scolast da litteratura m'ha ditg ina giada ch'ins sappia pir suenter tschient onns tge che saja vaira litteratura. Tut quai che vegnia lura anc adina legi u instrui saja litteratura genuina. Il grond rest percunter saja be lectura. Sco exempel ha el numnà il grond Theodor Fontane. Ses roman «Effi Briest», ozendi sia ovra litterara la pli enconuscenta, n'haja dal temp da Fontane betg gè tant success sco ses rapports da viadi che valian oz be pli sco meglra annotaziun da ses relasch litterar.

Tgi che consultescha in'enciclopedia per eruir quant lunsch che la Svizra è vegnida al campinadi europeic da quest onn, na vegn a chattar nagut. N'era betg da l'emprima participaziun da la Macedonia dal

Nord. E che l'Italia è daventada per la segunda giada campionesa europeica ils 11 da fanadur 2021 vegn en il meglier cas ad esser menziunà en ils lexicons universals cun in dumber da quatter cifras.

Ma nus na vulain – dal punct da vista linguistic – betg esser pli catolics ch'il papa. Che las mountainbikeras svizras han guadagnà als gieus olimpics a Tokio ils 27 da fanadur gist tuttas trais medaglias, è per mai almain «sport-istoric» – era sch'in tal triumf a gieus olimpics n'è betg reussì per l'emprima giada a la Svizra. Als gieus da stad da l'onn 1924 a Paris ha la Svizra medemamain gudagnà aur, argent e bronz en la disciplina da gimnastica «chaval a travers». La medaglia d'aur è ida dal reminent a Josef Wilhelm da Cuira. Ma quel n'ha betg vuli far da quai in'«istorgia» ed ha prendì per ses return en sia citad natala in tren ch'è partì pli baud che quel ch'el aveva annunzià per guntgir il bainvegni uffizial cun paucas e trumbettas sin la piazza da la staziun a Cuira. Ch'ins n'ha anc betg emblidà quai dal tut suenter prest tschient onns è schon insaco istoric. U betg?

Pieder Caminada è mainaproject scolaziun e redactur tar la «Südostschweiz». El è creschi si a Glion en in ambient per gronda part tudestg e viva oz en il vitzg rumantsch da Castrisch.

La convivenza da linguas e culturas cumpara mingamai igl glindesdi en La Quotidiana ed en la Südostschweiz.